

**CONVIVENZA**

# Survantscheglias relevantas per il sistem

VIOLA CADRUVI

**A** tgnamain avess jau quest onn gea la megl'ra stgisa per laschar crudar il termin annual tar mia igienicra da dents. Jau crai ch'i dat megliers temps per laschar furitgar enturn insatgi en mia bucca cun divers utensils e guaffens che vegnan reutilisads da e tar differentas persunas. Tuttina ses jau era quest onn sin la sutga sbassada ch'ins po volver en tuttas direziuns, vegn tschorventada da questa lampa bler memia clera e sent co ch'il stgalper sgriztga sur mes dents e co ch'il piz sa fora adina puspè (sche vuli u betg vuli na poss jau betg eruir) en l'ur da mias schunschivas.

**D**urant che jau ses pia qua, contemplesch jau las survantscheglias epiladas perfetgamain da mia igienicra da dents e ma fatschent cun tut questas dumondas che van ad ins tras il chau en tals muments. Co vegn ella d'epilar las survantscheglias a moda talmain perfetga? Fa ella quai mintga damaun? U va ella tar ina cosmeticra? Tutgi tar las cundiziuns da lavur dad igienicras da dents dad avair survantscheglias perfetgas? Vegn quai indemnisà da la fatschenta? Po ella forsa deducir ils custs da la taglia?

**È** la lavur da l'igienicra atgnamain relevanta



per il sistem? L'igiena vegn gea validada extremamain aut il mument. Da l'autra vart na para ina lavur che consista da chaveragnar enturn en buccas estras betg propi dad esser confurma a corona. Ma tge capita, sche la gliעד ha tuttenina in'entira massa tartagl, perquai che nagin na po pli ir tar las igienicras da dents? Virus sa chattan bain er en bucca? Tant pli impurtanta para l'igiena da la bucca.

**Q**uai dess tuttenina era tut in'otra paisa a la professiun da l'igienicra da dents. Sch'il pli grond privel en questa professiun era avant la pandemia da perder in det suenter la morsa d'in pazient impazient, para la professiun ussa tuttina pli privlusa. (Dal reminent, cun morsas da carstgauns n'èsi betg da far spass: pli baud stuev'ins amputar tar dapli che 30 pertschient dals cas. La sperdita d'in det n'è damai gnanca talmain exagerada.)

**I**nsumma, tge èsi cun ils umens igienichers? Datti da quels? U è quai er ina da quellas professiuns che existan mo en furma feminina, ch'èn pajadas consequentamain mal e che n'han nagin prestige? E sch'i dat umens igienichers, pon quels lura era deducir da la taglia ils custs per la cosmeticra? U per il cosmeticher?

**I**ns va propi en rudè sin questa sutga, constatesch jau, durant che la glisch ma tschorventa e ma fa vegnir tut sturna. U èsi perquai che l'igienicra ha smatgà il buttun? Ah gea, la sutga s'auza e sa volva en direziun dal lavandin per derschentiar la bucca. Jau prend ina bucca plaina e spid il liquid rosa en il lavabo. Las dumondas tgi che fa sias survantscheglias, tge ch'ella fadia u sch'ella è gia vegnida murdida, tragut jau. Alain Berset na dumandass jau gea era betg, era sche sias survantscheglias èn magari relevantas per il sistem.

**Viola Cadruvi ha studegià germanistica, istorgia e rumantsch a l'Università da Turitg. Mintgatant lavura ella vi da sia dissertaziun e mintgant sco scolasta, ma bunamain adina scriva ella.**

**La convivenza da las linguas e culturas en il Grischun – quai è il tema da la columna «Convivenza» che cumpara mintga glindesdi en la Südostschweiz ed en La Quotidiana.**